

貪心 e 人類

◎江秀鳳

盤古開天 e 時陣，上帝置地球頒布一項法令，所有 e 生物一律互恁三十年 e 歲壽，即款 e 規定不止仔公道，逐家嘛攏有贊成。

吓過，牛考慮半晡，猶是感覺無妥當，俗語講：「做牛做馬無了時」，做牛茲呢辛苦，愛拖犁、耕田，無論是日頭赤炎炎，抑是透風落雨，若準抵著農耕期，根本連禮拜叨無通歇暈，逐工攏愛做穡，想來想去欲活到三十歲，實在足辛苦 e！即個時陣牛叨舉手講：「報告上帝，阮牛 e 生活實在太辛苦咧，愛活三十年茲呢久，對阮來講實在是真大 e 拖磨，咁會使減二十年，阮干單欲活十年叨好。」

上帝感覺真為難，伊講：「地球頂所有 e 生物一律攏互恁三十年 e 歲壽，準講汝想欲減活二十年，安呢加出來 e 二十年欲互誰？」

即個時陣，貪心 e 人類叨趕緊舉手講：「互我！互我！」

上帝想想咧，若有人欲捏(dih)，安呢叨卡好解決。自安呢決定將加出來 e 二十年批准互人類，安呢人類 e 歲壽叨累積到五十歲矣！

猴聽著牛 e 提議，想著家己一出世，面叨皺(ziau5)皺，赫呢歹看，掠準活到三十歲，咁吓是又閣老閣vai呢？而且猴生性奸巧，面腔變化多端，老謀深算，無好鬥陣，即款 e 天性，準講活了siunn久，社會撇步學siunn儕，咁吓是親像吉普賽人全款，行到佗位叨互人吓喙瀾；若欲安呢，不如減活幾年仔卡贏，活得卡有尊嚴咧卡有影。

猴想到茲叨舉手說明家己 e 意思，伊講伊

干單欲活十年叨好，即個時陣上帝叨真頭疼囉，加出來 e 二十年欲安怎處理才好？想快到貪心 e 人類，袂輸驚互人搶去全款，大聲喝講：「互我！互我！我猶閣欲捏。」

猴既然無愛，上帝嘛無欲給勉強，只好給加出來 e 二十年，閣撥互人類。

安呢，人類 e 歲壽叨有七十高齡矣！

吓過，貪心 e 人類萬萬想袂到，置所有 e 生物內底，每一款動物攏各司其職，各養天年，每一款動物命運攏無全。

人類 e 智慧真懸，本來會凍真舒適過完三十年逍遙自在 e 人生，遂因為siunn過貪心，不知足，才使得後半世人食盡苦楚。人類對出世到三十歲之間，過著充實浪漫 e 日子，代先有快樂天真 e 童年，猶閣有親像詩全款 e 「青春少年時，吓知愁滋味」 e 黃金歲月，以及「問世間情是何物，直教人生死相許。」談情說愛 e 青春年華；閣來叨是人生 e 最高峰，「只羨鴛鴦無羨仙」，結婚生囝，圓滿如意，過著快樂幸福、多采多姿 e 生活。

可憐貪心 e 人類，因為加給牛討二十歲 e 歲壽，所以置三十到五十歲 e 時，叨愛繼承牛 e 命運，親像牛赫呢辛苦做穡，拖著一家大細，做牛做馬討生活；到甲五十至七十 e 年歲，閣繼承猴山仔 e 命運佻習性，面大量起皺紋，皮膚佻体力嘛漸漸老化去，而且愈來愈嚴重，習性嘛愈來愈親像猴山仔，狡怪閣奸巧，所以才有「老謀深算、老奸巨猾」即類 e 形容詞出現。

因為人類 e 貪心，致使世世代代 e 人類攏得著處罰，三十歲以前真幸福美滿；三十歲到五十歲之間，叨親像牛拖犁全款，為著生活受拖磨；到五十至七十 e 年紀，猴面佻猴性攏走走出來矣。

掠準活過七十歲以上 e 人呢，he叨愛看天公伯仔 e 面色囉，積善之家必有後福，所以咱做人叨愛知足！吓通貪心啦！